

www.BibleForChildren.org

Genesis 3



Ma satana na ngwae ne'eri ne'e sa Adam. Ana kaida'i ne'eri nia ka saea na 'afe nia 'ani 'i Eve, osi'ana nia'a na'a ne'e na te'a na ngwa'i to'a mauri ki.



'Iu ana ru ki ta'ifau ne'e God lawe nia saunga'inida na fa'i loi na'a ne'e ta'i ru ne'e nia kwa'atafa liu fuana 'oso'a.

'Una'eri ana ta'i asoa, na fa'i loi leka ma'i ma ka saefilo 'uri ana kini ne'eri, "Uri ma nia mamana ne'e God nia saea fuamuro'o noa'a koro'o kasi 'ania fufuana 'ai ki ta'ifau saena o'ola ne'e?"



Ma kini ne'eri ka
fata 'uri, "Noa'a 'uiri
'iira la'u. Kero'o ke 'ania
go'o 'amiro'o fufua'i ru ki
ana 'ai ki saena o'ola ne'e, bore ma God ka
saea, 'Tali 'ai ne'e uu go'o saena tofongana
o'ola ne'e noa'a koro'o kasi 'ania nama
koro'o kasi sama to'ona
fua'i ru ki ana. Si di'ia
koro'o 'oia ru abu ne'eri
koro'o ke ba'a mae.'"



Bore ma fa'i loi
ne'eri nia fata lala 'uri,
“Ala'anga ne'ana noa'a
'iri mamana. Koro'o kasi
mae go'o. God fata 'una'eri osi'ana nia saiana
ka sui na'a, si di'ia koro'o 'ania fua'i 'ai ne'ana,
maamuro'o ke ba'a 'ifi, ma koro'o ke ba'a
di'ia logo nia'a, ma koro'o
ka sai logo ana falafala
ne'e ta'a ki ma na falafala
ne'e le'a ki logo.”



Na kini ne'e nia lisia na 'ai ne'e lisilana le'a liu, ma fua'i ru ki bore ka le'a logo fuana 'anilani. Ma nia ka oga liua na'a ne'e nia ke kwa'atafa. Go'o nia ka ngalia na'a ti fua'i ru ana 'ai ne'eri, ma ka 'ania na'a, ma nia ka kwatea logo fuana ara'i nia, ma nia ka 'ania logo.



Tona go'o ma maadaro'o ka 'lifi na'a,
ma kera ka lia saiana ne'e kera'a tua
dadara na'a. Kaida'i ne'eri kera ka taia
na'a ra'i figi ki, ma kera ka toro na'a
'ani'i fafidaro'o.





Bore ma na God
lawe nia ri kwau 'uana na ngwae
ne'eri ka 'uri, “Se, 'uri ma 'ae'o na'a 'i fa'i kwa?”
Ma na ngwae ne'eri olisia ma ka 'uri, “'lu nau ku rongoa
'oko leka ma'i, ma nau ku ma'u, nini'a nau ku leka
ku ago 'i ne'e, osi'ana nau ku dadara.”






'Una'eri ma
God ka fata 'uri fuana,
“'Uri ma sa tai ne'e saea ne'e 'oko dadara
kwa? 'Uri ma 'oko 'ania fuana 'ai ba nau ku
luia koro'o kasi 'ania?”



Ma na ngwae ne'eri ka fata 'uri, "Iu, bore ma na
kini ba 'oko alua ka tua fa'i nau nini'a kwatea fua'i
'ai ne'e fuaku, ma nau ku 'ania na'a." 'Una'eri
go'o na God lawe ka fata ana na kini ne'eri
ka 'uri, "Fa'uta ne'e 'oko sasi 'uri kwa?"
Ma na kini ne'eri ka fata 'uri, "Na fa'i loi
na'a nini'a soke nau kwate ma nau
ku 'ania fuana 'ai ne'e."





Sui, na God lawe ka alua na'a ngwae ne'eri
'i maa fa'asia na kula le'a ne'eri 'i Iden.
'Iu, God nia saunga'inia na ngwae
ana na ano. Ma nia ka alua ngwae
ne'e ka rao na'a saena na ano
ne'e, ma ka o'ofia
na'a o'ola nia ki.





'I buri 'ana God ka alua ngwae ne'eri 'i maa, nia ka alua na 'ainseel ki ka folo 'usia bali 'uana fanelana sina ana kula le'a ne'eri 'i Iden. Ma kira ka folo suli bongi firi 'ania sele ni ofo'a ki.





Na sele ne'eri ki, na meamea ana
mafula ne'e ke du'a ma'i 'i maani,
ma ka liu kalia kula ne'eri ma
noa'a kasi mamalo.





Na God lawe nia sasi 'una'eri 'iri ka fonea na ngwae ki noa'a kira kasi leka karangi ma'i ana na 'ai ne'e fufuana kwatea ngwae ke mauri firi.




'Ilu sa Adam fa'inia 'afe nia 'i Eve, kero'a tua fiku na'a leleka nia ka ina ma ka fa'afuta na'a ta'i ngela ngwane sa Kein. Ma 'i Eve ka fata 'uri, "'Ilu lawe nia kwai'afi aku nini'a nau ku ngali ma'i na ngela ngwane."



Ma 'i buri 'ana, nia ka fa'afuta la'u ruana ngela ngwane sa Abel. Ma kaida'i sa Abel nia 'a'ana ma'i, nia ka sarea ma ka lia sulia na sipsip ki. Ma sa Kein ngwae ni rao saena o'ola.



Ana ta kaida'i, sa Kein ka ngalia na'a ti fanga saena o'ola nia, ka kwate'e 'ani na fo'osi nia fuana lawe. Bore ma sa Abel nia ngalia bibi sipsip eta futa ana na sipsip nia ki, ma nia ka saungia ka mae, ma nia ka ngalia na fasi ru saela ki, ma nia ka fo'osi ani fuana lawe.



Ma lawe ka saele'a liu fa'inia sa Abel ma na fo'osi nia,
bore ma noa'a nia kasi ala go'o fafia sa Kein fa'inia na
fo'osi ne'e nia du'afia. 'Una'eri sa Kein
ka saeta'a ka lilisu liu na'a,
ma na maana ka rada na'a.



Ana ta'i asoa sa Kein fata 'uri fuana ngwae futa nia sa Abel, “Koro leka saena o'ola.” Ana kaidali kera'a tua saena o'ola, sa Kein ka fu'alia ngwae futa nia, ma ka saungia ka mae na'a.



'Una'eri 'i buri 'ana, lawe ka saefilo 'uri ana sa Kein,
“'Uri ma ngwae futa 'oe sa Abel nia 'i fa'i?” Bore ma sa
Kein ka fata lala 'uri, “Nau ku 'iri saiana. 'Uri ma na
rao'a nai lala ne'e fuana lia'a
sulia na ngwae futa nau?”



Go'o, sa Kein ka leka na'a kwau 'ana fa'asia kula lawe nia tua ana. Ma nia ka tua na'a ana bali ana fane lana mada'afi ana 'i Iden na kula kira saea 'ani 'i Nod.



Sa Adam fa'inia 'afe nia 'i Eve kero'a tua fiku nama 'adaro'o ka leleka 'i Eve ka fa'afuta la'u ta ta'i ngela ngwane ne'e sa Set. Ma 'i Eve ka fata 'uri, "God nia kwatea la'u ma'i ta ngela ngwane la'u fuaku, 'iri ka didifulia sa Abel ba sa Kein saungia ka mae na'a."




Sui sa Adam nia ka tua la'u sulia 800 fa'i ngali ki,
ma ana kaida'i ne'eri nia ka alua la'u ti ngela ngwane
ma ti ngela kini la'u. Ma ana kaida'i nia mae
nia tua na'a sulia 930 fa'i ngali ki.



Ma kaida'i ne'eri lawe ka lisia na ngwae ana magalia kira ta'a liu na'a. Kaida'i ki ta'ifau manatalada ngwae ki ta'ifau ka ta'a. Sui lawe ka fata la'u 'uri, "Nau kui ba'a fa'asuia na ngwae ba nau ku saung a'inida ki fa'asia na magalia ne'e."



“Ma na ru 'ae'aela ki, fa'inia ti ru ne'e ango
fafona ano, ma na fa'i no'o ki logo, nai ba'a
fa'asuida. Nau'a go'o ne'e nau ku
saunga'inida. Bore ma 'i ta'ena nau
ku manataida liu.”



Bore ma sa Noa go'o ne'e lawe nia saele'a liu
fa'inia. Sa Noa go'o ne'e ta'i ngwae ne'e tua'olo'olo,
ma noa'a nia 'iri fulia ta ru fuana ngalia
kwa'i kwa'inga ana kaida'i nia tua
saena magalia, ma nia ka
donga God ana
manatalana
ta'ifau.



God fa'ata'inia na alafe'anga doe nia
fuana na ngwae ki ta'ifau saena magalia
ne'e 'uri, nia ka kwatea ma'i ta'i Ngela
muta'i nia, fasi 'iri sa tai ne'e
kira fa'amamana ana nia'a,
noa'a kira kasi funu, bore
ma kira ke ba'a
mauri firi.



Romans 3:23

Ngwae ki ta'ifau go'o kira abula ta'a, ma noa'a ta ngwae 'iri tua 'ani falafala ne'e ke fa'adufa God.

Romans 6:23

Sulia na abula ta'anga'a nia kwatea mae'a, bore ma na kwate'a ne'e God kwate sakongali ana nia na'a ne'e mauri'a firi sulia sa Jesus Christ na Aofia kia.

Hebrews 9:27

Aia, ma na ngwae saena magalia ne'e ki, kira mae ana ta'i fa'i kaida'i go'o, sui mala God ke ba'a matalanga'inida.



Ephesians 2:8,9

God fa'amauri kia 'ani na alafe'anga nia sulia na fa'amamana'anga kia. Nia noa'a kasi fa'amauri kia go'o osi'ana rao'a kia ki talaka. Bore ma God kwate 'o'o go'o ana na mauri'a faolu fuaka. Nia ne'e, 'afita'i ta ngwae ka fata naunau sulia na mauri'a faolu nia, sulia God noa'a kasi kwatea sulia ta rao'a ne'e kulu sasi'i ki.

Romans 10:9,10

Di'ia kamu saea sa Jesus 'ani na Aofia, ma muke fa'amamana ne'e God ta'ea fa'asia na mae'a, God ke ba'a fa'amauri kamu. Na ngwae ne'e nia fa'amamana ana sa Jesus saena maurilana nia 'olo'olo 'i maana God. Ma na ngwae ne'e nia fata tafa 'ania sa Jesus nia Aofia, God ke ba'a fa'amauria



John 3:16,17

God fa'ata'inia na alafe'anga doe nia fuana na ngwae ki talifau saena magalia ne'e 'uri, nia ka kwatea ma'i ta'i Ngela mutali nia, fasi 'iri sa tai ne'e kira fa'amamana ana nia'a, noa'a kira kasi funu, bore ma kira ke ba'a mauri firi. God noa'a kasi kwatea ma'i na Ngela nia saena magalia fuana na matalanga'ilana na ngwae ki, bore ma nia ka kwatea lala ma'i fuana fa'amaurilada.

1 John 5:11-13

Ma ala'anga ne'e God ka fa'amamana sulia na Ngela nia ne'e 'uri: God kwatea na'a na mauri'a firi fuaka, ma na mauri'a ne'e ka 'ita ma'i fa'asia na Ngela nia.

Ma sa tai bore 'ana ne'e tua fiku fa'inia na Ngela God, nia to'o ana na mauri'a firi. Ma sa tai ne'e noa'a kasi tua fiku fa'inia na Ngela God, nia noa'a kasi to'o logo ana na mauri'a firi. Nau ku keresia na ru ne'e fuamu'a ngwae ne'e fa'amamana ana na Ngela God, fasi 'iri muke saiana ne'e kaumulu to'o na'a ana na mauri'a firi.



Jenesis 3 – 6

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: M. Maillot, Tammy S.

Kwara'ae Bible (kwf) © 2003, Wycliffe Bible Translators, Inc.
All rights reserved.

<https://www.bible.com/en-GB/bible/1904/GEN.1.KWF>

©2026 Bible for Children, Inc.

www.M1914.org www.bibleforchildren.org

